


Kata Pengalo – Ngalo Ras Momo

Turang ras senina i bas Tuhanta Jesus Kristus, selaku serayan Tuhan, ikataken kami mejuah-juah ras Selamat Wari Minggu man banta kerina. Man bandu kekelengen kami si sekali enda denga erkebaktin i bas gerejanta enda, ikataken kami mejuah-juah. Kerehenndu nambahi keriahen man banta kerina. I bas bena kebaktinta mari dage sidengkehken momo kerna perdalanen perpulungen Tuhan, bage pe rencana pelayanan gerejanta ku bas wari-wari si reh enda ([Ngogeken Momo](#)).

Kata Penaruh



Minggu enda bengket kita ku bas Minggu Ehipanias si pemena. Ehipanias eme Dibata ncidahkan diriNa man manusia gelah manusia banci nandai Dibata alu payo. Si enda enggo ipetangkasNa arah ketubuhen Jesus Anak Dibata. Janah arah Minggu Ehipanias si pemena enda, Dibata tole mpetandaken diriNa arah dampar sideban man banta, gelah reh tangkasna penandainta kerna IA. Sebab kalak sinandai Dibata, ietehna kap sura-sura Dibata, jenari itandaina pe dirina selaku tinepa. Alu bage, ngasup kita nuduhkan keleng ate Dibata i bas geluhta si teptep wari.

Erkata Lonceng

(Perp. Tedis)

Rende

KEE No. 365 : 1, 2, 3

(Serayan Kebaktin Bengket Ku Mimbar)

Kebaktin Minggu, 05 Januari 2025
Minggu Kenca Tahun Baru

3	Votum – Salam <i>(Perp. Tedis)</i>
L	I bas gelar Dibata Bapa si enggo encidahken kuasana arah kerina tinepa, i bas gelar AnakNa Jesus Kristus si maba rupa Dibata ku doni enda, ras i bas gelar Kesah Si Badia nampati kita nandai perukuren Dibata. Malem ateta erkiteken seh wari enda, Dibata mpetandaken diriNa man banta si erbahanca tuhu-tuhu sitandai IA ras sura-suraNa guna sigeluhken i bas geluh erkiniteken. Amin
P	Amin Amin Amin <i>(iendeken)</i>
4	Berita Kerna Perbahanen ras Sura-sura Dibata (Invocatio)
L	“Kam kap si mbelin, Kam kap si terberita, Kam kap si mulia, Kam kap si mehulina dengen Kam kap si Mada Kuasa. Kerina langit ras doni Kam si madasa, Kam kap raja, pemerintah i babo kerinana” (1 Kronika 29 : 11). Erpalasken Kata Dibata enda, sipuji IA alu ras kita rende : KEE No. 354 : 1, 2, 3
5	Pujin Man Kemulian Dibata <i>(Perp. Kundul)</i>
L	Dibatanta enggo empetandaken diriNa alu erbage-bage dalan, gelah kuh dalan manusia nandai Dibata si mada kuasa. Doni inganta nggeluh ras kerina tinepa enda, eme tanda kuasa ras ulina rancangan Dibatanta.
P	Ipuji kami Kam Tuhan, kiniulin tinepaNdu naksiken kuasa ras kiniulinNdu.
L	ItepaNa pe kegeluhen rikut biakNa si erbage-bage, rikut ras biak manusia si erbage-bage, gelah reh kuhna kiniulin i doni enda, dengen reh buena dalan manusia ngenanami kiniulin Dibata.
P	Bujur Tuhan, ibahanNdu kami bagi ringring i bas sada kula, bagi anak i bas sada keluarga. Kuh kal dalan kami, ngenanami kiniulinNdu. Pengasup kami ngergai ras makeken pemereNdu si mehuli.

L	Sipuji Tuhan alu ras kita rende arah : KEE No. 306 : 1, 2, 3
6	Kinata Kegeluhen Manusia i Bas Nimai Kerehen Dibata
L	Adi doni enda eme saksi kiniulin Dibata, dengen dirinta eme kehadiran rupa Dibata i bas doni enda, kuga nge pengerganta kerna kiniulin Dibata i sekelewetta? ras i bas dirinta?
P	Ngaku aku Tuhan, megati kal la ku ergaken kiniulinNdu si lit isekelewetku, i bas diringku, bagepe i bas temanku manusia?
L	Kuga nge pengerganta kerna kiniulin Dibata i bas dirinta ras i bas temanta manusia?
P	Ngaku aku Tuhan, megati kal la ku ergaken kiniulinNdu si lit i bas diringku, bagepe i bas temanku manusia. Alemilah dosangku o Tuhan!
L	Sisehken pingko-pingkonta man Dibata alu ngendeken : KEE No. 95 : 1, 2, 3
7	Padan Dibata Man Si Ngakuken Kinilatunggungenna <i>(Perp. Tedis)</i>
L	Selaku persuruhan Dibata, aku nehken kataNa man banta si erkadiola dengen nggit jera i bas dosa ras kelepakenna : <i>“kalak singkelengi Aku, dengen si engkelengi kerina tinepangKu, Kukelini me ia, dengen kalak singakui Aku kap Tuhan, Kukawali me ia rasa lalap”</i> Meriah ukurta i bas kita enggo ngaloken padanNa, emaka rende kita : KEE No. 184 : 1, 2, 3
8	Kata Dibata <i>(Perp. Kundul)</i>
a	Marilah sibegiken Kata Dibata si man ogenken ibas Minggu enda sini ibuat ibas Kitab Roma 1 : 18 - 25 . Mari siogeken secara pegancih. Sibenaken pengogenta
	<u>Ise pe la benar i lebe-lebe Dibata</u>
1:18 L	Pernembah ate Dibata ipetangkas i Surga nari ndabuh ku kerina kejahatan manusia si la nggit nembah man Dibata. Erkiteken

	kejahatenna, manusia encekak ketuhu-tuhun e.
1:19 P	Ersalah manusia e, sabap kai si banci ietehna kerna Dibata, tangkas me man bana. Dibata nge si petangkassa man bana.
1:20 L	Mulai kin doni enda ijadiken Dibata, tangkas kap biakNa si la teridah, e me KuasaNa ras KinidibatanNa si la ermasap-masap. Si enda banci igejapken manusia arah kai si enggo ijadiken Dibata e. E maka lanai lit perdalihenna kerna kai si enggo ibahanna e.
1:21 P	Itandai manusia e nge Dibata, tapi la ipehagana Dibata e bagi Dibata; bage pe la ia ngataken bujur man Dibata. Tapi perukurena kerna si sia-sia saja, janah pusuh peratenna si batu-batun e ikuasai si gelap.
1:22 L	Ngaku ia pentar, tapi motu nge ia.
1:23 P	Itadingkenna kiniulin Dibata si la ermasap-masap jenari isembahna patung-patung manusia, perik-perik, rubia-rubia si empat nahena, bage pe rubia-rubia si njoler si biakna kerina ermasa-masap.
1:24 L	Erkiteken si e ipelepas Dibata ia nehken sura-surana si melket, dengen ngelakoken perbahanen-perbahanen si cemar nandangi kulana sapih-sapih ia.
1:25 P	Itukarkenna kebenaren Dibata alu guak. Labo Dibata si isembahna, tapi si ijadiken Dibata e nge ipuji dengen isembahna. Arusna kin si Njadikenca e nge ipuji seh rasa lalap! Amin.
	<p>Ketuahen kalak si megiken Kata Dibata, dengen si makekenca i bas geluhna si teptep wari. Haleluya.</p> <p>Ialoi perpulungen alu ngendeken :</p> <p><i>Haleluya Haleluya Haleluya</i></p>

b	Ertoto guna Khotbah
c	Khotbah : Masmur 145 : 1 - 9. Tema : “Perbahanen Tuhan Tetap Iberitaken”
d	Ertoto kenca khotbah
9	Pengakun Kiniteken <i>(Perp. Tedis)</i>
	<p>Aku tek man Dibata Bapa si la ersibar kuasaNa, si nepa langit ras doni.</p> <p>Aku tek man Yesus Kristus anakNa si Tonggal Tuhanta, si jadi arah Kesah si Badia, tubuh i dur singuda-nguda nari si so keliamen, tergelar si Maria, si ngenanami kiniseran sangana pemerintahen Pontius Pilatus, nipakuken ku kayu persilang, mate je nari ikuburken, nusur ku doni kematen, peteluwariken enggo keke ibas si mate nari, nangkih ku surga, perkundulna arah kemuhen Dibata Bapa si la ersibar KuasaNa, je nari reh me IA pagi ngeranaken si nggeluh ras si enggo mate.</p> <p>Aku tek man Kesah si Badia, janah lit sada Gereja si Badia, persadan kalak si Badia, pengalemi dosa, kinikeken kula, kegeluhen si rasa lalap. Amin.</p>
10	Persembahen <i>(Perp. Kundul)</i>
L	<p>Kata Dibata si jadi palas i bas kita ngendesken persembahenta man Dibata : <i>“Dibatangku si simpar alu kebayaken si lit i bas Kristus Jesus mererken kerina keperlunndu” (Pilipi 4 : 19).</i></p> <p>Iherta ngendesken persembahen rende kita i bas : KEE No. 366 : 1, 2, 3, 4</p> <p>Pertoton Persembahen ras Pertoton Syafaat</p>
11	Perpadanen Man Dibata <i>(Perp. Tedis)</i>
L	Kiniulin tinepa Dibata i sekelewetta, eme tanda kehadiran Dibata i bas doni enda.
P	Erpadan aku Tuhan, tetap aku njaga kiniulin tinepaNdu, sebab kuidah kerehenNdu arah kiniulin tinepaNdu i sekelewetku.

L	Kehadiren Gereja, eme tanda kehadiran Dibata i tengah-tengah doni enda.
P	Erpadan aku Tuhan, tetap aku njaga kiniulin gerejaNdu, sebab gerejandu me dalan kami ngaloken gegeh, ras keleng ateNdu i bas kegeluhen kami.
L	Kam itepa tudu ras tempas Dibata. Kam eme tanda kehadiran Dibata i bas doni enda.
P	Erpadan aku Tuhan, tetap kujaga rupaNdu i bas rupanku, pusuhNdu i bas pusuhku, gelah idah doni enda, maka Kam engkelengi doni enda, ekelang-kelangken diringku
L	Guna peteguhi perpadanendu man Dibata, sipuji Tuhan alu rende : KEE No. 274 : 1, 2
12	Pertoton Tuhan
13	Pengutusen ras Pasu-Pasu Dibata
	Laweslah ku bas kegeluhendu si teptep wari, cidahkenlah persadandu i bas Kristus, alokenlah pasu-pasu idur Dibatanta nari : <i>“Dibata sumbul kemalemen ate e gelah sincukupi keperlundu guna ndalanken si sentudu ras peratenNa. Janah Dibatalah erdahin i bas kam arah Jesus Kristus gelah kam ngelakoken kai si ngena ateNa, man Kristuslah kemulian seh rasa lalap” Amin.</i>
	Ialoi perpulungen alu ngendeken : A..min A....min Amin
	<i>SELAMAT HARI MINGGU/SYALOOM.....</i>